
КЕЛАЖАКНИ КИМЛАРНИНГ ҚЎЛИГА ТОПШИРАМИЗ?!

Бу йил Қўштепа туманида мактаб ва касб-ҳунар коллежларини тамомлаётган ёшлар орасида чемпионлар, билимлар беллашувлари ғолиблари, ҳунарманд ва тадбиркорлар кўпчиликини ташкил этади.

Қўштепа туманининг бир неча тилларда равон сўзлашувчи, билимдон, ғайрат-шижоатли ёшлари вилоят ҳокими Шухрат Ғаниев билан бўлиб ўтган юзма-юз суҳбатда келажак билан боғлиқ орзулари, режа-мақсадлари хусусида мароқ билан фикр алмашдилар.

- Бизнинг талабалик йилларимиз билан таққослаганда бугунги ёшлар чинакамига бахтли,-деди вилоят раҳбари. - Муҳтарам Президентимиз ташаббуси билан мамлакатимиз олий таълим муассасаларига қабул квотаси кейинги уч йилда 90 мингдан 204 мингга етказилди. Бу йил Фарғона вилоятидаги олий таълим даргоҳларига 23 минг нафар йигит-қизлар ўқишга қабул қилинади. Ҳозирги кунда Фарғона вилояти олий таълим муассасалари сони кўплиги жиҳатидан пойтахт Тошкент шаҳридан кейин иккинчи ўринда туради. Бугунги кунда нафақат сон, балки илмий салоҳият, профессор-ўқитувчилар эришаётган ютуқлар салмоғи жиҳатдан ҳам Фарғонадаги институт ва университетларимиз нуфузи тобора юксалиб бораётгани қувонарлидир.

Мадинахон Ҳошимова тумандаги 2-ИДУМИнинг 11-синфини олтин медаль билан тамомлади. Мадина келажакда она тили ва адабиёт фани ўқитувчиси сифатида баркамол авлодни тарбиялаш ниятида. Ўзаро суҳбат чоғида вилоят раҳбари Мадинанинг орзулари албатта рўёбга чиқишига ишонч билдирди.

Шоҳистахон Ҳамролиева, Оминахон Жабборова, Шерзодбек Одилов, Зилола Мўминова, Муҳаммадрасул Миролимов, Маржона Назирова сингари битирувчи ўғил-қизлар вилоят ҳокими, вилоятдаги олий таълим муассасалари ректорлари билан суҳбатда ўзларини қизиқтирган барча саволларга жавоб олишди. Ҳарбий, архитектор, спорт мураббийи, чет тиллар ўқитувчиси, болалар боғчасида тарбиячи каби шарафли касбларни танлаш истагидаги навқирон авлод вакилларианинг орзу-интилишлари қувонишга арзийди.

Қўштепа транспорт коллежи битирувчиси Амирбек Орипов бокс бўйича кўплаб мусобақалар ғолиби. У Фарғона давлат университетида ўқиб, бокс мактаби ташкил этиш ва мураббийлик фаолиятини олиб боришни ният қилган. Файзулло Маъруфжонов трикотаж цехи ташкил этиб, 7 та тенгдоши учун иш ўрни яратган. Аҳлиддин Каримовнинг асарларичиликда 5 йиллик тажрибаси бор. Вилоят ҳокими бу икки ёш йигитга “Ҳар бир оила - тадбиркор” дастури доирасида 30 миллион сўм миқдорида имтиёзли кредит ажратиш бўйича шу ернинг ўзида тижорат банкларига тавсия берди.

Юзма-юз суҳбат давомида Фарғона давлат университети, Тошкент Ахборот технологиялари университети Фарғона филиали, Тошкент Тиббиёт академияси Фарғона филиали, Фарғона политехника институти ректор ва проректорлари ёшлар билан бевосита мулоқотга киришди. Суҳбатларда қабул жараёнидаги янгиликлар, битирувчиларга яратилаётган имконият ва имтиёзлар батафсил тушунтирилди.

Учрашувда кўзлари чакнаб турган, билимли ва тарбияли ёшлар Қўштепа туманининг келажаги истиқболли эканлигини англатувчи йўлчи юлдузлари эканлиги эътироф этилди.

Фарғона вилояти ҳокимлиги Ахборот хизматиFacebook, Telegram, Веб сайт, YouTube

2020-06-22 18:14:14